



# **JABATAN PERKHIDMATAN VETERINAR**

**LAPORAN PEMANTAUAN MEDIA**

**29 MEI 2024 (RABU)**

# Tak Perlulah Berkira Lembu Korban Makin Mahal

MEDIA	RUANGAN	MUKA SURAT	TARIKH
Sinar Harian	Cetusan	16	29 Mei



**Nota Di Sebalik Tabir**  
BERSAMA MERAK JALANAN

**RAYA** korban tinggal berapa belas hari saja lagi. Sesuai namanya, hari raya itu sinonim dengan ibadah korban.

Ikut data Jabatan Veterinar tahun lalu, bekalan lembu korban 2023 ialah kira-kira 40,000 ekor lembu dan kambing 300,000 ekor. Dengan kata lain, sekitar 300,000 orang sahaja lakukan ibadah korban dalam negara tahun lalu berbanding 16 juta penduduk Islam.

Walaupun hukumnya sunat, ibadah korban sangat dituntut. Nabi berkorban 100 ekor unta pada tahun ke-10 Hijrah.

Merak Jalanan tak nafikan harga lembu korban terus naik. Di tempat Merak Jalanan dua tahun dulu baru RM750 untuk satu bahagian, tahun ini meningkat RM900 satu bahagian.

Sebaik-baik lembu korban itu adalah yang paling elok, paling cantik dan paling gemuk. Ramai yang tersalah konsep.

Ada yang kata lagi murah lagi bagus. Ada juga yang bandingkan lembu korban dengan durian musang king, kalau rasa mahal tak payah beli.

Merak Jalanan tak salahkan mereka. Mereka nak berjimat sebab kos sara hidup tengah melambung. Namun kos ternak lembu juga telah naik. Sebab itulah ada orang sanggup seludup lembu dari Thailand khas untuk korban.

Banyak ibadah yang secara tersirat menggagalkan umat Islam menjadi orang kaya atau setidak-tidaknya pandai urus kewangan. Salah satunya ibadah korban.

Merak Jalanan sudah banyak mendengar kisah pekerja stesen minyak, peniaga pasar malah warga asing yang sanggup simpan duit tiap bulan untuk cukupkan bayaran korban. Khabarnya hidup mereka rasa tak sempurna kalau tak buat ibadah korban bila tiba Aidiladha.

Ramai antara kita yang sanggup menabung untuk membeli gejet, melancong, ubah suai rumah atau membayar duit muka kereta tetapi terlupa ibadah korban.

Tak kisahlah hendak lembu mahal atau murah, yang penting dalam ibadah korban ialah keikhlasan. Buatlah ikut kemampuan dan jangan berkira dengan ALLAH.

## Tak perlulah berkira lembu korban makin mahal

MEDIA	RUANGAN	MUKA SURAT	TARIKH
Sinar Harian	Negeri	26	29 Mei

# Galak PBT bina rumah kucing, anjing

Elak masalah kacau ganggu, beri perlindungan kepada haiwan terbiar

Oleh MOHD IZZATUL IZUAN TAHIR  
SABAK BENAM

Pihak berkuasa tempatan (PBT) Selangor khususnya yang bertaraf bandar raya digalakkan menyediakan sekurang-kurangnya satu pusat perlindungan kucing dan anjing terbiar bagi mengelakkan isu kacau ganggu dan risiko keselamatan kepada orang awam.

Exco Kerajaan Tempatan dan Pelancongan, Datuk Ng Suee Lim berkata, pembinaan pusat perlindungan yang menempatkan haiwan terbiar itu boleh dibuat dengan kerjasama badan bukan kerajaan (NGO) di setiap PBT terlibat.

Menurut beliau, setakat ini tiga daripada 12 PBT yang terdiri daripada Majlis Bandaraya Shah Alam, Majlis Bandaraya Diraja Klang dan Majlis Bandaraya Subang Jaya telah menyediakan pusat perlindungan haiwan.

"Saya akan turun padang untuk melihat sendiri fasiliti disediakan. Jika tidak cukup, kita akan minta PBT yang membina pusat perlindungan ini untuk tambah baik.

"Setakat ini kita telah memberi peruntukan sebanyak



Suee Lim (dua dari kanan) melawat pameran pada Majlis Perasmian Kempen Santuni Haiwan #luvyourpet MDSB 2024 dan MoU Penguatkuasaan Bersepadu Haiwan Berkeliaran di Dewan Seri Bernam, Sabak Bernama pada Selasa.



RM150,000 kepada MBSJ untuk melaksanakan program ini," katanya.

Beliau berkata demikian ketika ditemui pada sidang akhbar selepas Majlis Perasmian Kempen Santuni Haiwan #luvyourpet MDSB 2024 dan Majlis Menandatangani Persefahaman (MoU) Penguatkuasaan Bersepadu Haiwan Berkeliaran di Dewan Seri Bernam di sini pada Selasa.

MoU dilaksanakan antara Majlis Daerah Sabak Bernam (MDSB), Majlis Perbandaran Hulu Selangor dan Majlis Perbandaran Kuala Selangor.

Bagaimanapun, Suee Lim berkata, buat masa ini kebanyakan PBT berdepan kekangan kewangan untuk membina pusat perlindungan haiwan terbiar berikutan kosnya yang tinggi.

Jelasnya, pembinaan pusat perlindungan itu bagi tempoh

jangka masa panjang memerlukan perbelanjaan jutaan ringgit terutama membabitkan kos makanan, penjagaan dan kesihatan haiwan.

"Sebab itu kita galakkan orang ramai datang mengambil kucing dan anjing terbiar di pusat perlindungan ini.

"Jika haiwan ini dikumpul dalam pusat perlindungan ia akan menjadi satu beban besar kepada PBT," tambahnya.

Selain itu katanya, kerajaan negeri juga giat mengadakan program pemandulan kucing dan anjing bagi mengurangkan populasi haiwan terbiar itu.

Katanya, usaha itu boleh dilakukan dengan kerjasama antara PBT dan Jabatan Perkhidmatan Veterinar.

"Saya yakin kaedah seperti ini dapat mengurangkan keresahan rakyat sekali gus menjadikan PBT di Selangor proaktif ke hadapan dalam menyayangi haiwan terbiar," tambahnya.

**TERIMA KASIH**

DISEDIAKAN OLEH:

UNIT KOMUNIKASI KORPORAT  
JABATAN PERKHIDMATAN VETERINAR